

## Baraka za Ibada za Sabato

*Wala tusiache kukusanyika pamoja, kama ilivyo desturi ya wengine; bali tuonyane; na kuzidi kufanya hivyo, kwa kadiri mwonavyo siku ile kuwa inakaribia—*  
**Waebrania 10:25.**

**L**eta zawadi yako maalum kabisa kwa Mungu kwenye siku Yake takatifu. Hebu uzima wa thamani wa nafsi utolewe Kwake katika ibada takatifu....

Kila mtu anapaswa kuhisi kwamba ana sehemu ya kufanya katika kuufanya mkutano wa Sabato kuwa wenye manufaa. Hampaswi kukusanyika pamoja kikawaida kama jambo la mtindo tu, bali kwa ajili ya kubadilishana mawazo, kwa ajili ya kusimuliana uzoefu wenu wa kila siku, kwa ajili ya kuonesha shukrani, kwa ajili ya kueleza shauku yenu ya kweli ili kuangaziwa na Mungu, mpate kumjua Mungu na Yesu Kristo Aliyemtuma. Kubadilishana mawazo kuhusiana na Kristo kutaimarisha nafsi kwa ajili ya majaribu na mapambano ya maisha. Kamwe msifikiri kwamba mnaweza kuwa Wakristo na bado mkawa na utengano. Kila mtu ni sehemu ya mtandao mkubwa wa wanadamu na uzoefu wa kila mmoja unaweza kuamuliwa kwa ukubwa na uzoefu wa wale anaoshirikiana nao.

Kwa nini hatufikii asilimia mia moja ya Baraka tupaswayo kupata kwa kukusanyika pamoja ili kumwabudu Mungu? Uwezo wetu wa ufahamu unahitaji kunolewa. Kushirikiana kila mtu na mwenzake kunapaswa kutupatia furaha. Kwa tumaini hili tulilo nalo, kwa nini mioyo yetu ising'atishwe kwa upendo wa Mungu?

Katika kila mkusanyiko wa kidini tunapaswa kuja na utambuzi wa kiroho uliohuishwa kwamba Mungu na malaika Zake wako hapo, wakishirikiana na waabudu wote wa kweli. Unapoingia mahali pa ibada, mwombe Bwana aondoe uovu wote moyoni mwako. Leta nyumbani Mwake kile tu ambacho anaweza Akakibariki. Sujudu mbele za Mungu hekaluni Mwake na visalimishe Kwake vilivyo Vyake, ambavyo amevinunua kwa damu ya Yesu. Omba kwa ajili ya mhubiri au kiongozi wa ibada. Omba kwamba Baraka kuu iweze kuja kupitia yule ambaye anapaswa kulihubiri neno la uzima. Jitahidi kwa bidii kupata Baraka kwa ajili yako mwenyewe.

Mungu atawabariki wale ambao wanajiandaa hivyo kwa ajili ya ibada Yake. Wataelewa kile inachomaanisha kuwa uthibitisho wa Roho kwa sababu wamempokea Yesu kwa imani.

Mahali pa ibada panaweza kuwa patulivu mno, lakini pasitambuliwe na Mungu. Kwa wale wanaomwabudu Mungu katika roho na kweli na katika uzuri wa utakatifu patakuwa kama lango la mbinguni. Kusanyiko la waumini linaweza kuwa dogo kwa idadi, lakini mbele za Mungu ni wa thamani mno. Kwa mshikamano wa ukweli wamechukuliwa kama mawe yenye mikwaruzo kutoka kwenye machimbo ya kidunia na kuletwa katika karakana ya Mungu ili kuchongwa na kusawazishwa. Lakini hata katika mikwaruzo ni wa thamani mbele za Mungu. Shoka, nyundo na patasi ya majaribu viko mkononi mwa Yule aliye mahiri; vinatumiwa, si ili kuharibu, bali ili kukamilisha ukamilifu wa kila nafsi.

**(Testimonies for the Church 6:361-363).**